

A SANTA MARIA DI CUSTUNACI

La to chiesa supra un salciatu è fabbricata,
Supra na petra, lustra e culurita,
Perlatu, libicciu e di balata,
Liscia comu stoffa di sita,
Gira pi lu munnu ed è apprizzata;
È comu na perla nall'abitu di zita,
Tu la criasti, cu la manu tua biata.

Lu populu è lu giudici capaci,
N'America c'è lu to marmu chi stralluci,
L'Australia lu richiama, tantu, piaci,
Signu di civiltà chi s'introduci.
Lu passanti osserva, guarda e taci,
Perlatu, libicciu, breccia, tanti luci.
Tuttu lu munnu loda cu na vuci
Stu pizzu cofanu di Custunaci.

A CUSTUNACI

Custunaci, paisi di custerera,
Cu aria frisca di villiggiatura,
Li casi longu la strada, a filanera,
Umbrusi, stannu nmezzu la virdura.
La bedda villa, chi pari na ciurera,
C'è arti, c'è musica e pittura;
Li fimmini beddi comu na bannera,
Lu passanti guardannu s'innamura.

A mezz'ariu luci comu un razzu
Munti Cofanu, sta gran petra a pizzu,
Chi mpilliccia li villini e lu palazzu,
Chi tuttu lu munnu sapi lu ndirizzu,
E lu mari piscusu di Corninu,
Cu li so cernii, li scorfani e l'acchiati.
A tagghiu di lu mari, mpizzu mpizzu,
Lu ristoranti fa li cuscusati.

Si guardati quantu è sapuritu
Lu davanzali di la Chiesa, lu salciatu,
Fattu di cuticchi e quadrittiatu,
Pari chi duna a lu passanti u nvitu.
La Madonna, cu ddu figghiu allatu,
Pi li biddizzi si resta sbalurditu.

Custunaci, ti lu dicu veramenti,
Tu hai arti cu li dipinti,
Vicinu a tia ci starrìa cuntenti,
E, pi sti pochi voti chi haiu vinutu,
Accetta sti cumplimenti e ti salutu.

AGRIGENTU, STIDDA D'AMURI

Benvenuti turisti d'ogni razza!
La Sicilia, cu dilicatizza,
Vi strinci affittusa a li so vrazza,
Cu tuttu lu talentu e tinnarizza.
Sta conca d'oru, ch'è tanta biddazza,
Fonti d'antichità e di ricchizza,
Chi la natura fu tanta bunazza,
Chi la criau supra na carizza.

Agrigentu, s'ì stidda d'amuri,
Comu un presepio, supra l'altari,
Duni tanta luci e splinduri.
Tuttu lu munnu ti veni a salutarì,
Quannu si metti lu mandurlu nciuri.
Li usignoli cca vennu a cantari,
Nta stu tappitu, chinu di fulguri
Cu musichi e custumi, p'abballari.

Li chiesi, li templi e li casteddi,
Misi npunenti, comu tanti addi,
Ricchi di culonni e capiteddi,
Martiri di frecci, spadi e baddi,
Ricordu di citati e paiseddi
Distrutti d'armi bianchi e cu cavaddi
Di Spagnoli, Africani e Franciseddi,
Cu Cartagini e Greci a li so spaddi.

Guerri e storia nni cunservi tantu,
Di la Cuncordia hai lu monumentu,
Quadru di civiltà, quadru d'incantu,
Quadru di nubiltà, quadru purtentu.
Agrigentu, si tutta bedda e ti dicantu
Stu figghiu e la riliquia nsacramentu.

QUANTU SI BEDDA

Nun fu mastria e mancu ciriveddu,
Lu Criaturi stava all'anguliddu,
Allungau la manu e lu pinzeddu,
Cupiau e fici st'angiuliddu.
La luna ti pittau di lu purteddu,
Lu sulì ti fici l'occhi comu a iddu.
Sì un quadru di lu criatu tantu beddu,
Lu munnu fa cangiari un to vasiddu.

Forsi bedda mia tu nun ci criri,
Dunni passi tu, la luci appari,
Si comu lu sulì nta li iorna chiari.
Lu sguardu, chi fai mbrividiri,
Di Papa', mamma e cu t'avi a maritari,
Sì tutta la gioia di lu so avviniri.

A PACECO

Guardu lu me paisi ch'è n'amuri,
Tagghiату cu lenza, chiummu e squadru,
Comu lu stessu di guardari un quadru,
Fattu d'un celibri pitturi.
Li strati dritti, larghi, squadrati,
Cu l'anguli perfetti e ripuliti,
Di tipa ntagghiati e rifiniti,
Hannu sfidatu li so antichitati.
Spissu lu cuntemplu e riflettu,
È un paisi simmetrico, perfettu.

Propriu nta lu cori du paisi,
C'è na chiazza granni, ben squadrata,
Cu tri scaluneri e na firrata,
Cu anguli di marmu, ben suspisi;
Sembra na villa la pineta,
Fatta cu tantu sintimentu;
A centru c'esti lu gran munumentu,
Cu l'aquila trista e scuntrubata,
La Cattidrali, in arancioni fina,
Cu la prutittrici, Santa Catarina.

Nta tri filati, fatti tutti a stili,
Livanti, tramuntana e punenti,
C'è na bedda filata di sedili,
Chi ospita, lu iornu, tanta genti,

È la sala di li ricevimenti
Di ricchi, mezzu cetru e puvireddi,
Risittaculu di li vicchiareddi,
Chi sfoganu l'affannu e li lamenti,
Cu si godi filici la fumata
E cu ristuppa la cannuzza ntartarata.

E li giovani cu la so ragazza,
Sta granni celeberrima ricchezza,
Ci fannu l'amuri, cu s'abbrazza abbrazza,
Cu tuttu lu talentu e tinnarizza!
Giovani, chista è la vostra chiazza,
Ci dati chiu grazia e chiu ducizza.

E quannu n'austu c'esti lu fistinu,
Sutta sti pigna, nmezzu sta ringhiera,
Lu cantu nesci chiu giuiusu e finu;
Un usignolo canta a la ciurera.
Vi parla sinceramenti Serafinu:
Nta stu paisi è sempri primavera.

TEMPI PASSATI

Trent'anni fà, nta stu paisi,
Lu zu Ciccio e Bastianeddu
Vinnianu l'acqua strati strati,
A na lira u sicchiteddu.
Tutti chi currianu,
Cu li bummuli, assitati,
E spissu succirianu
Li sciarri e cutiddati.

Lu prugressu ha ghiutu avanti,
(Sia ludatu e binidittu!),
Nun c'è casa, nun c'è strata,
Chi nun havi l'acidrittù.
Vabbeni chi nun currinu
Di la sira a la matina,
Ma ni lavamu, ni sciacquamu,
C'impastamu la quacina.

La za Peppa mpacchianedda,
Lu zu Ciccio ncausi tila,
Di notti si susianu,
Pi lu micciu da cannila,
Li surci ci lu mangiavanu
E o scuru lu circavanu.

Peppa dunn'è? Nto cantaranu.
Tra tannura e piattaloru,
Cun cirinu nta na manu
E l'otra manu a l'ogghialoru.
Ora lu surci un ci va cchiù
C'è a piretta e la baciù.

Picciriddi, nta la scola,
Pi iri a fari la pipì,
Di ritrè mancu ci nn'era,
La facianu accussì.
La scola era ridicula,
Cu cadenti mura e porti,
Ora invece i scoli brillanu,
Ci sù tutti li cunforti.

Ricordu la Duminica,
Cu li scarpi lucidati,
D'invernu scapisavamu
Lu fangu strati strati.
Ora i fanghi dunnì su?
Puru i curtigghia su sfaltati!
Dunnì c'eranu casupuli,
C'è li granni palazzati.

Pacecu, sì un salottu,
Da Siniazza a Biviratura,
Pi turisti e prisidenti,
Deputati e Sinatura.
Iò dassi mani e peri,
Sugnu un figghiu tou divotu,
Pi descrivirti chiu beddu,
Sugnu lu veru pacicotu.

TERRA NOSTRA

L'avemu sempri pronta l'anzalata,
Cu tutti li spiticchi, ben cundita,
Pantiddarìa la chiapparedda spuntinata,
Mazara la sardina sapurita,
Castedduvitranu l'oliva sua schiacciata,
Partanna l'ogghiu finu, cu la ndrita,
Una fedda di miluni nzucarata
Di Pacecu, cu la scorcia culurita,
Alcamu inchi di vinu la cannata,
Lu Munti la mustazzola prifirita,
Trapani teni la tavula cunzata
E Marsala lu bicchirinu, pi la zita.

E dopu tutti, finuti di mangiari,
Suddisfatti, cu la panza china,
Li Trapanisi solinu passiarì,
Si godinu la loggia e la marina
E verso sira si virinu sfilari
Cu li machini, supra all'Ericina,
Pi putiri a lu tramontu, cuntimplari
Li raggi d'oru di la siritina.

Talianu di l'altura di lu Munti
Sta Trapani, comu na fauci lucenti
Pi metiri lu lavuru, iunti iunti,
Pi fasciari li gregni soi, pussenti.

Sona lu brunzu di lu campanaru,
Li cicali c'intonanu lu coru.
A lu burgu, la Madonna di l'Altaru
Ni binidici lu pani, lu lavoru,
Lu sali, lu curaddu, li tunnari.
Trapani ama e nun si pò scurdari.